

A COUËNTA DOU RAT BRUSSON (ROBERTA SOMMESE)



Én pasèn dezeit eunna quiénda, un rat ou l'at echtchanca-se a pel.

Donca ou va avó o tsavatìn é ou ié dit :

« Tsavatìn, tsavatìn, sèi pasà dezeit a quiénda é l'èi echtchanca-me a pel ; pou-te mé l'afité ? ».

« Ma oi, piquió rat ! Ma i l'èi manca di sée pé t'afité a pel. Té fat alé avó o portchet demandé quiécca dé sée ».

Donca o rat ou sé moda pé alé avó o portchet.

« Portchet, portchet, pou-te mé doné quiécca dé sée ? Iò i porto peu le sée ou tsavatìn é o tsavatìn m'afita peu a pel qu'i l'èi echtchanca-me én pasèn dezeit a quiénda ! ».

« Ma oi, piquió rat ! Ma i l'èi manca dé quiécca dé fareunna pé té poé doné le sée. Té fat alé avó o moléni demandé a fareunna ».

Donca o rat ou va tanque ou molin.

« Moléni, moléni, pou-te mé doné quiécca dé fareunna ? Iò i porto peu a fareunna ou portchet, o portchet mé dona peu le sée, iò i porto peu le sée ou tsavatìn é o tsavatìn m'afita peu a pel qu'i l'èi echtchanca-me én pasèn dezeit a quiénda ! ».

« Ma oi, piquió rat ! Ma i l'èi manca dou gran pé fére a fareunna é té la doné. Té fat alé tanque ou tchamp demandé quiécca dé gran ».

Donca o rat ou sé moda é vat ou tchamp.

« Tchamp, tchamp, pou-te mé doné quiécca dé gran ? Iò i porto peu o gran ou moléni, o moléni mé dona peu quiécca dé fareunna, iò i porto peu a fareunna ou portchet, o portchet mé dona peu le sée, iò i porto peu le sée ou tsavatìn é o tsavatìn m'afita peu a pel qu'i l'èi echtchanca-me én pasèn dezeit a quiénda ! ».

« Ma djacque, piquió rat ! Ma i l'èi manca dé quiécca dé fumì pé fére créche o gran é té lo doné. Té fat alé avó a vatcha demandé dé fumì ».

Donca, o rat, belle légnà, ou sé moda pé alé a l'ehtabio troé a vatcha.

« Vatcha, vatcha, pou-te mé doné quiécca dé fumì ? Iò i porto peu o fumì ou tchamp, o tchamp mé dona peu o gran, iò i porto peu o gran ou moléni, o moléni mé dona peu quiécca dé fareunna, iò i porto peu a fareunna ou portchet, o portchet mé dona peu le sée, iò i porto peu le sée ou tsavatìn é o tsavatìn m'afita peu a pel qu'i l'èi echtchanca-me én pasèn dezeit a quiénda ! ».

« Ma djacque, piquió rat ! Ma i l'èi manca dé quiécca dé fén pé té poé doné o fumì. Té fat alé tanque ou pra demandé dé fén ».

Donca o rat, co pi légnà éncorra, ou sé moda é vat ou pra.

« Pra, pra, pou-te mé doné quiécca dé fén ? Iò i porto peu o fén a vatcha, a vatcha mé dona peu quiécca dé fumì, iò i porto peu o fumì ou tchamp, o tchamp mé dona peu o gran, iò i porto peu o gran ou moléni, o moléni mé dona peu quiécca dé fareunna, iò i porto peu a fareunna ou portchet, o portchet mé dona peu le sée, iò i porto peu le sée ou tsavatìn é o tsavatìn m'afita peu a pel qu'i l'èi echtchanca-me én pasèn dezeit a quiénda ! ».

« Ma oi, vonti piquió rat ! Ma i l'èi manca dé quiécca d'éva pé fére créche l'erba. Té fat alé tanque ou ru demandé quiécca d'éva ».

Donca o rat, belle crèpà pé a lègna, ou sé moda é ou va ou ru.

« Ru, ru, pou-te mé doné quiécca d'éva ? Iò i porto peu l'éva ou pra, o pra mé dona peu o fén, iò i porto peu o fén a vatcha, a vatcha mé dona peu quiécca dé fumì, iò i porto peu o fumì ou tchamp, o tchamp mé dona peu o gran, iò i porto peu o gran ou molèni, o molèni mé dona peu quiécca dé fareunna, iò i porto peu a fareunna ou portchet, o portchet mé dona peu le sée, iò i porto peu le sée ou tsavatìn é o tsavatìn m'afita peu a pel qu'i l'èi echtchanca-me én pasèn dezeit a quiénda ! ».

Donca o ru ou dona l'éva ou piquió rat, o rat ou porta l'éva ou pra ;

o pra ou ié dona o fén, o rat ou porta o fén a vatcha ;

a vatcha a ié dona o fumì, o rat ou porta o fumì ou tchamp ;

o tchamp ou ié dona o gran, o rat ou porta o gran ou molèni ;

o molèni ou ié dona a fareunna, o rat ou porta a fareunna ou portchet ;

o portchet ou ié dona le sée é o rat ou porta le sée ou tsavatìn qu'ou y afita a pel qu'ou l'at echtchanca-se én pasèn dezeit a quiénda !